

# ЛҰИМА СЭРИПОС

9 марта  
2017 года  
№5  
(1143)

Общественно-  
политическая газета  
Ханты-Мансийского  
автономного  
округа-Югры

[www.khanty-yasang.ru](http://www.khanty-yasang.ru)

E-mail: [gazeta@khanty-yasang.ru](mailto:gazeta@khanty-yasang.ru)

Основана 11 февраля 1989 года

## НЭ ХӨТПАТ ЯНЫТЛЫЯНҮВ!



С. Ромбандеева вӑрум хури

Ты хурит Анна Дмитриевна Ромбандеева пӧслым блы. Тав Хальӱс районг Нӑрт сӑлы ӱрим яласы. Ты ӑтпост Ханты-Мансийск ӱст округ янытыл блнӑ сӑлы ӱрнӑ мӑхум мӑгыс касыл вӑрыглавес, тав ӧс тыг ӧхгалас, касыс. Ты ӧвытыг мӧтыг газетат ловиньтӑн.

Ты  
номерт  
ЛОВИНЬТӢН:

Товлыӑ ӱит  
урыл потыр  
хассыт

2

Щӑнь лӑтӑув  
ӑлаль  
тотылӱв

4

Саранпӑвылт  
нӑврамыгт мӑгыс  
рӱпитан кол  
25 тӑлӑ  
тӧвлыс

8-9

Ӧлттумп  
пӑвылт  
яныгмам  
нӑ

14

Россия янытыл  
ТОВТЫЛ  
кассыт

16

## ЛҲХХАЛЫТ

# Пустагыл олнэ магыс савнув ёмыгтэн

**Т**ы талув округувт пустагыл олнэ талыг лаввес. Ты кастыл РИЦ «Югра» ляххал тотнэ колн терапевт-лэккар хум Кирилл Камнев, округ пұльницат мәнн нйврамыт пусмалтан лэккар хум Владимир Чепанов ос округ пұльницат рұпитан хирург ойка Дмитрий Кислицин вовиньтальвёсыт. Махум пустагыл олнэныл магыс маныр рұпата варава, тән ты урыл тот потыртасыт.

Лэккар хөтпат лавё-гыт, ань ты накт мир савыңпалэ савсыр агманылт хотталы шалтэгыт. Тамле тарвит вормаль мощчанув вос олыс, нанкинән акваг ўргалым оньщелын. Ань махум келп агмыл, тувыл сым агмыл, рак-агмыл ос мот сыресыр агмытыл ватихал ати-мыг ёмтуңкве патсыт.

Таимагыс ань пуста-гыл олнэ тал янытлан кастыл, лэккаранув яныг рұпата ты тэла щирыл воруңкве патэгыт, хөтпа агмыл ул вос ёмтыс. Щар өвлэт хохса хартуңкве ат эри, ләглыл савнув кон ёмыгтэн ос ёмщакв тэпьялэн. Ёмщакв ол-нән магыс нэматыр агмыл ат ёмтэгын.

Махум агмыл ул вос ёмтсыт, лэккарыт кина суссылтан тотап хосыт акваг хултыглахтын кинат суссылтэгыт. 2009 талт округувт нилахуйплов «Центр здоровья» наппа пус-малтахтын колыт пус-вёсыт. Тыгыл нила кол нйврамыт уральтан магыс рұпитэгыт.

Молты талт атпан-кем сотыра хөтпа тот лэккарытн сусвёсыт. Ты хөтпатныл туп ват нупыл хурум процент савит элүмхолас пу-стагыл олсыт. Мотаныт пуссын матыр агм ошсыт. Ань пұльницат уральтахтын магыс олн ойтуңкве ат эри.

Хөтпа хунь уральтах-туңкве тахмаи, тонт тув



ёхтуңкве вёрми. Лэкка-рыт касың хөтал махум пирмайтэгыт. Матыр агм оньщегын ке, тара тот лававён ос пусмал-таңкве кётавён. Элүм-холас тот шар янытэт уральтаве. Пустагыл олэ-гын ке, хурум тал мины ос уральтахтын магыс тув ялуңкве вёрмегын.

Нән ос нанки акв мат ул ўнлэн. Лэккарыт лавёгыт, каснэ колн ат ке ялантэгын, нас ёмыг-тэн, тыгле-тувле нёв-сын магыс матыр рұпа-та вәрён. Ань округувт савсыр каснэ колнакыт пұнсым олэгыт. Касың хөтпа такви касуңкв

манос нас ёнгасаңкв тув ёхталаңкве вёрми. Хө-тал сыс ват кум ты вәр-малы магыс хөнтэгын ке, ты сака ёмас паты. Нән нэматыр агмыл ат ёмтэгын.

Пустагыл олүңкве таңхегын ке, вина ул аён, хохса ул хартэн. Ал-пыл квәлэгын, сарятка воруңкве ул ёрувлэн. Тонт нанан нэматыр тэрпи ат эрмыглы, хайтыл яласаңкве па-тэгын. Тара мәнлат хөтпа хольт каркамыг ёмтапегын тах.

**Николай  
МЕРОВ**

## Товлың ўит урыл потыр хассыт

Ас-угорский ин-ститутт рұпитан махум ань касың тал рётың юсвой этпос ват нупыл овыл щислат махум щән ләтңыл диктант хансуңкве вөвияныл. Та хөтал касың мир танти ләтңаныл янытлан хөталыг олы.

Ты тал ты институтт библиотека колнакт ам мәнщи ләтңыл диктант ловиньтаслум. Тув хус хөтпа хансуңкве ёхталасыт. Тән хала-нылт савыңпалэ лә-тың ёмщакв ваганыл, потыртэгыт, ловиньтэ-гыт, хансэгыт. Ос төва мәнлат хөтпат мощ

торгамтэгыт, акв-тит латың ювле лавуңкве вёрмегын.

Диктант каснэ порат потыр нила щёс ловиньтаңкве рөви. Пус-сын сэръярыг хўнтлы-сыт ос хансуңкве та овылтахтасыт. Ты Юрий Вәлла руш ләтңыл хан-сум потре, таве мәнщи, ханты ос ёрн ләтңытын толмашлавес. Потыр акв лөпс яныт, тав товлың ўит урыл хансым олы. Хумус тұрвоиг пители вәрсыг ос та ляпат сав-сыр ўирищит питит ос вәрсыт. Ты ўиг нйврамён вуянтым нэмхотьют ляпан ат тәртэг, таимә-



И. Дементьев вәрүм-хури

гыс мот ўирищит та ляпат нйвраманыл янмалтыяныл.

Потырт тамле ләт-ңыг олэг – тарыг ос тарыг. Овыл латыңт а буква нумыл щуртмил ат оньщи, ты ййв урыл потыр олыс, ос титыт латыңт буква а нумпалт щуртмил эри пөстыгпаңкве, ты товлың ўи урыл хан-

сым олыс. Тамле щурт-мил атим те, тонт оши-бкаг ловиньтахты.

Махманув пуссын ём-щакв диктант хассаныл, лавёгыт, туп нила ос ат оценкал ўнттувёсыт. Касың хансум хөтпа ань такви номере щирыл Ас-угорский институт сайтэт оценкатэ сун-суңкве тах вёрми.

**Галина КОНДИНА**



# Лёккарыт Саранпавылн ялсыт



А.И. Щетников

**М**олал Саранпавылн ялмумт пўльницац шалсасув. Тот алпыл онтолов щёс авит пōхат такем сав маҳум лўлөгьт. Тыи, насати, Хальўсныл савсыр лёккарыт ёхтысыт ос маҳум тән палтаныл атхатасыт.

Павыл пўльницац това агмыт пусмалтан лёккар атим, ос тән тэлы лёх олнэтэ сыс мань павлытын ёхталэгьт. Саранпавылт сав маҳум олы, таимагыс лёккарыт акв сатн тув ёхталасыт.

**Софья Владимировна Чагина**, Хальўс пўльницацаныл ёхталам лёккар, манавн потыртас:

— Мән тал сыс кит щёс маҳум уральтан магыс мань павлытын кетыглавёв. Мән Няхшамволь павылн, Хулюмсўнт, Кульпас, Лопмус ос Саранпавылн ялантэлёв. Ты павлыт ляпат олнэ маҳум танки тув ос ёхталэгьт. Таквсы порат мән садикн ялнэ ос школат ханищтахтын няврамыт уральтыянув, пусмалтыянув.

Тэлы лёх олнэ порат рўпитан маҳум ос пенсионерыт сунсыянув. Мән тыт бригада щирьл онтолов савсыр лёккар рўпитэв. Павылт манхурип лёккар атим, таит мән ётув ёхталэгьт. Ань Саранпавылт хирург-лёккар рўпиты, таимагыс тамле хōтпа мән ётув ат ёхтыс.

Амки терапевт ос профпатолог-лёккарыг олэгум, ам ётум ань нэ хōтпат пусмалтан, УЗИ вәрнэ лёккар, психолог, нарколог, эндокринолог, пальнёл пусмалтан лёккар, сам лёккар, невролог ёхтысыт. Рўпатат эрнэ тогапсованув пуссын ёт-тотыгыянув, сам пусмалтан лёккар сам суснэ утанэ тотыс, паль-нёл-тур пусмалтан лёккар ос эрнэ утыт ёт-оныхи. Мот сырсыр диагностика вәрнугьт ос ёт-выганув, това пўльницац тамле утыт ат оныхгьт.

Мән палтув ёхтум элумхōлас лёккарытын

янытёт сунсаве. Тыи профосмотрыг лававе. Мән янгыщ савсыр организацият рўпитан хōтпат ёт рўпитэв, тән кўшаяныл ёт договорнэпак хансэв. Та щирьл мән палтув тартает. Мән тыт акв сат сыс 350 рўпитан хōтпат сунсуңкве алымёв. Пенсионерыт, нас агмың хōтпат мән палтув ос ёхталэгьт. Элумхōлас медицинский полис ёт-оныхи ке, мән таве ос сунсылув. Тованакт шар этипалаг мус пўльницац хультсэлэв.

Саранпавыл — яныг павыл, кит-хўрум хōтал сыс пуссын уральтанкве ат алымёв, таимагыс тыг хосаннув ёхталэв. Савыңпалэ маҳум описторхоз-агм, сым ос келптарс агм оныхгьт. Тамле агмыт касың павлыт хōнтэв, туп тыт сōрыгуй-агмыл савннув хōтпат пусмалтахтэгьт манос мощ юв-урхатым олэгьт, няр хўл ат тэгьт ос пусмалтахтуңкве ат таңхэгьт.

Товат пусмалтахтасыт ос ётыл хўл тэңкве оста патмыт, ань китынтыг тән пусмалтахтуңкве ат касасгьт. Мән ёрыл пусмалтахтуңкве нэмхотьют ат лавилув, нас туп тән ётаныл потыртэв. Ты агм ошнэ хōт-

па тыгыл элалы тэпхўрге агмыңыг ёмты, тувыл алпитэ мосмуңкве вёрми, алписове аллергиян ханхаве.

Ос пувласпи агм (рущ щирьл рак лававе) урыл лавёгум, ты павылт маҳум тамле агм сака ат оныхгьт. Хōтпа агме сартыннув ке хōнтылув, тōнт тэрпил тара пусмалтанкв рōвэгьт. Сым агманыл маҳум ос ул вос тўйтыяныл, мән палтув тара вос ёхталэгьт.

Ань мән ётув эндокринолог-лёккар ёхтыс. Тав савсыр агмыт, нёвлиң-тэпың хōтпа ошнэ агмыт хōнты ос маҳум пуссын пусмалтыянув.

Мән хосат тагыл павлыт халт яласым рўпитэв, тот олнэ маҳманув товат вāңкве патсанув. Лёккар лавнэ латың ёмшакв хўнтлын хōтпат пусмалтыянув.

**Алексей Иосифович Щетников**, Хулюмсўнт павыл пўльницац терапевт-лёккарыг рўпиты. Тав Хальўс лёккарытн Саранпавылн ялуңкве вōввес. Хум хōтпа манавн лавыс:

— Ам тыг этпосн рўпитанкве ёхтысыт. Тыт рўпитан лёккар пōхан минас, ос маҳум пусмалтанкве эрэгьт. Саранпавылн ам овыл щёс ёхтысум, павыл яныг, сав маҳум олэгьт. Сат хōтал рўпитанэм сыс сым агм ошнэ сав маҳум ёхталасыт. Савыңпалэ матумпалаг олнэ хōтпат. Павлын акваг тыт рўпитан лёккар хōнтуңкве эри. Шар сака агмың хōтпа санавиациял Хальўсн пусмалтанкве кетылув. Тот сунсаве ос Ханты-Мансийскан ман Нягань ўсн элалы кетае.

**Тамара МЕРОВА**



С.В. Чагина

## ЛЯХХАЛЫТ

## Ща́нь ла́тңу́в э́лаль то́тылу́в



**М**о́лал соссаң ма́хману́в ханты, ма́ньщи Мос ё́рн ла́тңыл дикта́нт хассы́т. О́кругүвт пуссын аквё́т на́лыманкем тамле хаснэ́ кол рү́питас. Ты ва́рмалы́ таима́гыс щё́питавес, сосса́ң ма́хум та́нки ща́нь ла́тңаны́л ул вос ё́рувласаны́л. Ло́виньтым по́тыр Ю́рий Ва́лла, нэ́пак хансу́м ё́рн хум, тав о́лме́т хансы́гласте́. А́нь ты по́тыр ма́ньщи ла́тңыг Ма́рия Ку́маева, ма́ньщи нэ́, тав то́лмащласте́.

Ты кастыл Ханты-Мансийск үст «Ма-вит ос Элумхóлас» на́мпа музейн ху́румхуйплов хо́тпа ё́хталас. Тот ты по́тыр ма́ньщи ла́тңыл Светла́на Дини́сламова, А́с-уго́рский институ́тыт рү́питан нэ́, тав ло́виньтасте́. Ты уры́л тав то́х ла́выс: «Ты та́л Го́сударственны́й Ду́мат рү́питан яны́г ку́щаюв Та́тьяна Го́голева Мосќва үст о́с ма́ньщи по́тыр хансы́с. Хоты ма́т ма́ньщи ма́хману́в о́лэ́гыт, ма́н та́наны́лн пуссын ла́всу́в. Са́в хо́тпа дикта́нт хансу́ңке ка́сашас. Тате́м ё́мас ва́рмалы́, ма́н ё́тув акв венгр

пыг ма́ньщи ла́тңыл по́тыр хансы́с. А́тхата́м ма́хум таве ка́саласаны́л, хо́т-ща́гтсы́т. Ты хаснэ́ ва́рмалы́т ка́сың хо́тпа номтэ́ ё́мас о́лыс. Тыгы́л э́лаль ма́хману́в та́нки ща́нь ла́тңаны́л ё́мщакв хани́щта́ңке та́хмаё́гыт та́х. Мо́т хо́н миры́т ма́н ла́тңу́вты́л о́с са́ка пү́мщала́хтэ́гыт, то́ват ша́р ё́мщакв по́тыртэ́гыт. Тамле ва́рмалы́ са́ка ё́мас, ма́хману́в та́нки ща́нь ла́тңаны́л э́лаль то́тыяны́л».

Венгр пыг Норберд Си́ладьи Ве́нгрия ма́т Сеге́д үс униве́рситеты́т ма́ньщи ла́тңыл по́тырта́ңке ха-

ни́щта́хты. Тав мо́лты та́л ва́т са́грапна́л э́т-по́ст ты́г о́кругүвн ё́х-тыс. Ма́ньлат пы́г ру́щ ла́тың ша́р ат ва́гтэ́, ту́п ма́ньщи ла́тңыл по́тырты. Ты́т о́лнэ́тэ́ сыс тав Ко́ндинский райо́н Шу́гур па́вы́лн хо́нта́ң ма́ньщи́яну́в па́лт я́лыс. Я́ңк на́тнэ́ э́тпос му́с ты́т рү́питы́, ту́вы́л ю́вле ми́ны.

Ма́хману́в хуму́с по́траны́л хассы́т, Ана́стасия Фе́дий, та́кви а́ги о́пари́щ наме Вью́ткина, «Ма-вит ос Элумхóлас» на́мпа музе́йт рү́питан нэ́, Евдо́кия Хо́зумова, о́круг ра́дио хо́сыт ма́ньщи ла́тңыл ля́ххалы́т по́тырта́н нэ́, о́с Ни́кита Па́ртанов, А́с ма́ньщи хум, та́н ура́льтасаны́л.

Ни́кита Па́ртанов Ха́нты-Ма́нсийск ү́ст са́в та́л сосса́ң ми́р о́лупса э́лаль то́тым рү́питы́. А́нь ў́щлахты́, сы́ме ма́ны́р рү́пата та́хмаи, та́ рү́пата та́ ва́ри. Ху́лпаи, нэ́пакн по́тры́т хансы́, «Ю́гра лы́лыё́п» а́ссоциа́ция́т сосса́ң ми́рн не́тми́л ва́ри. Хо́таль во́ваве, то́т та́ рү́питы́.

А́нь 8 ма́рт я́лпың хо́тал ка́сты́л ам таве не́кветн я́ны́тлан ла́тың ла́ву́ңке во́вы́слум. Тав нэ́ хо́тпаты́н тамле ла́тың ке́тыс: «О́влэ́тяны́тлан ла́тың ам ма́ньщи а́гияну́вн ла́ве́гум, та́н ё́мас ва́рмалы́ ва́ре́гыт,

пе́с йис на́кану́в э́лаль то́тэ́гыт. А́щаны́лн, а́ңканы́лн ё́мас хо́т-па́г я́нмалта́вёсы́т, са́в ё́мас ва́рмалы́н хани́щта́вёсы́т.

Па́вы́лт о́лнэ́ я́ны́г хо́тпаты́н шу́нь-па́ща ла́тың ке́тэ́гум. Ты ша́р ма́н му́тра́ң э́квану́в. А́нь ма́к щё́лың хо́тпану́в ма́нь па́вы́лт ты о́лэ́гыт. Та́н пе́с ма́ньщи о́лупса ши́ры́л о́лэ́гыт, ма́ньщи ла́тңыл по́тыртэ́гыт о́с ня́врама́ны́л хани́щта́гы́т.

Ты я́лпың хо́талт ам та́наны́лн тамле ла́тың ке́тэ́гум. Ё́рыңы́щ, му́тра́ңыг о́с ё́мщакв э́лаль вос о́лэ́гыт. А́нь ма́лты́п хо́талы́т ё́мтэ́гыт, са́вну́в ко́н ё́мы́гтэ́н. Ня́врама́ны́н ў́ргала́м о́ны́щэ́н, пе́с йис ва́рмали́н хани́щтэ́н, э́лаль о́лнэ́ хо́талы́н аква́г по́сыңы́г вос по́сты. Со́тыңы́г о́лэ́н!»

Тамле ты пү́маш та́лан ма́ньщи хо́тпану́в а́тхаты́гласы́т. Сосса́ң ма́хману́в дикта́нт ка́сың та́л хансэ́гыт. Ты хо́сыт та́н, са́кати, ща́нь ла́тңаны́л хани́щтыя́ны́л о́с э́лаль то́тыя́ны́л. А́нь а́тхаты́глам ма́хум пуссын ё́мщакв по́траны́л хассаны́л. Ты́има́гыс ка́сың хо́тпа музе́йны́л пү́маш нэ́пакы́л майвес.



Р. Бардина (Партанова) ос Н. Партанов

Николай САВЕЛЬЕВ



# Мāхумаквет, ўргалахтым ълэн

**Общественный связь департаментыт рўпитан нэ Евгения Останина кўщай хѡтпат ос ляххал тотнэ мāхум округ мирколт акван-атыгласанэ. Тāн ань ѡлнэ акв вāрмаль урыл потыртасыт. Рўпитан хѡтпат ўргалахтым вос рўпитасыт ос ляххал тотнэ мāхум ты урыл эрнэ щирыл вос хассыт.**

Ты кастыл рўпата департаментыт кўщай вāңын хум Максим Новичков, рўпата ўргалан кўщай хум Игорь Тебеньков, савсыр организацият профсоюзанылт кўщайг рўпитан хум Фёдор Сиваш ос Югорский университетыт агитпыгыт ханищтан нэ Елена Гудожник тув вѡвиньтāлвёсыт.

Евгения Останина лāвыс, 2014 тāлт округ мирколт эрнэ нэпак щёпитавес, руш щирыл лāваве — «О концепции уллучшения охраны труда в Ханты-Мансийском автономном округе — Югре до 2030 года». Тыимāгыс округувт ляххал тотнэ хѡтпатын ань рўпатат ўргалахтын

урыл савнув потыр хансуңкве эри. Мāхманув ты урыл вāим вос рўпитасыт, ань ты номт акваг элаль тотуңкве патаве. Ос ляххал тотнэ хѡтпат мир мāгыс хўлтыглан лāтың эрнэ щирыл хансуңкве лāввёсыт.

**Т**ав юи-пālэт Максим Новичков потыртас. Кўщай хум лāвыс, округувт ляххал тотнэ хѡтпанув рўпитан мир урыл савнув емас потыр вос хассыт. Ляль нак ул вос емтыс, рўпатат хумус ўргалахтуңкве эри, мākты урыл потраныл вос ѡлэгыт. Ань юи-ѡвил тāлытт рўпатат мѡрсың порат махум сакватахтэгыт ос мощща хѡтпа порсуңкве патыс, ос ты āти, тамле

тāрвитың вāрмаль ин сав емталы. Ты ляххалыт акваг элаль тотуңкве эрэгыт.

Елена Гудожник лāвыс, ань рўпата урыл конференцият, семинарыт, ханищтахтын колт ос савсыр олимпиадат, форумыт вāрыглавет. Хѡтпа таквинātэ акваг ўргалым вос ѡнщитэ. Тѡнт ѡлупсатэ емаснувег емты.

**Ф**ёдор Сиваш лāвыс, та элумхѡлас, хотыот ляль накн рўпатат патыс, тав урётыл ѡс хансуңкве эри. Хумус тав ты накн патыс, маныр емтыс ос хумус тав нѡтаве, мир ты урыл вос вāгыт. Та хѡтпа ѡлупсатэ элаль хумлег емтыс, манарыл нѡтвес, та ѡвилтыт ѡс лāвуңкве эри. Тѡва порат тох емталы, хѡтпа рўпататэ вāрим порсы ке, ляпа рўтэ нѡматарыл ат нѡтаве. Кўщай хѡтпат сакватахтын манос порсын хѡтпа мāгыс олн ойтуңкве ат таңхэгыт. Тыимāгыс

рўпата уральтан инспекция хотпат тāн ѡтаныл акваг сутытахтэгыт.

**Т**ы вāрмаль емщакв щёпитаңкве рѡви, туп ляххал тотнэ хѡтпат савнув потыр тамле накн патнэ элумхѡлас урыл вос хансэгыт. Тѡнт мощщанув тамле тāрвит вāрмаль тах емты. Кўщай ос рўпитан хѡтпат номсахтуңкве патэгыт, хумус рўпатанылт ўргалахтуңкве эри. Тувыл ос ты урыл хотты хѡтпа ловиньты манос кина суснэ тѡтап хосыт сунсы ке, тав такви ѡс ўргалахтуңкве паты.

Ты сапрāнин атхатыглам хѡтпат, ты вāрмаль щирыл эрнэ потрыт тāстуңкве потыртахтасыт. Савыңпālэ тамле ляххалыт хансуңкве эрэгыт, тѡнт хѡтпа тамле ляль накн рўпататэ ат паты. Ты эрнэ тѡлат пуссын нэпакн хансавет ос ляххал тотнэ колытн кѡтавет тах.

**Николай МЕРОВ**

## Тāн нāй харыгтан мāt рўпитэгыт

Мѡлты тāl Хальўс район янытыл ѡлнэ тѡва хум хѡтпат ѡтпостем Ягрим пāвилт нāй харыгтаңкве ханищтавёсыт. Тāн халанылт ат хѡтпа Лѡпмусныл ѡлсыт. Тот ань нāй харыгтан мāхум мāгыс кол ўнттувес, кўщайг **Василий Петрович Хатанзеев** паттувес. Ам тав ѡтэ хѡнтхатыгласум, рўпатаныл урыл китыгласум. Нāн ань тав потре ловиньтэлбін:

— Мāн ювле хуль-тум тālт ѡйттур ѡтпост рўпитаңкве ѡвилтахтасѡв. Ат хѡтпа рўпитѡв.

Ты тāl нѡматыр ляль ат емталас. Хоталь-āти эрнэ матыр пуссын ѡнщѡв. «Буран» ос «Квадроцикл» мāшинал тотвесѡв. Акв утэ тѡлы яласан мāгыс, мѡтанэ ос туи. Тѡн сас сун ѡнщѡв, тув вит пўшка тālттуңкве рѡви. Маснутыл ос лāгыл маснутыл майвесѡв, пуссын самын пинсанѡв. Илттыг вѡвавѡв те, мāн тāра масапахтѡв, та нѡвумтѡв.

Телефонув пāвилт мāхманувн лāвыслѡв, ань пуссын вāганыл. Матыр ѡвил емтапи те, тāн мāнавн вос свонитэгыт: 8-90249-45626.



Василий Петрович ос тав ѡтэ рўпитан пыгыт сака эрнэ тѡла вāрэгыт. Тананыл мāн хум хѡтпат ѡлум ялпың хѡталыл янытлыанѡв! Пуссын

пустāгыл вос ѡлэгыт, пāвилт мāхманыл вос ўргалыяныл!

**Светлана РОМБАНДЕЕВА**

## ХАНИЩТАП

## Няврамыт потыртасыт



«Лылын союм» колн ялантан аҕирищит

**М**ан, ханты ос маньши газетаг редакцияв, Мос «Югра лылыёп» общественный организация няврамыт маҕсыл касыл вараыглас. Видеоконкурсыг лавнэ касыл ань щар овыл щёс варауҕке номылматаслүв. Няврамытын танти ханищтап стихотворение манос потыр кинан послуҕке ос манавн тетуҕке эрыс.

Пуссын аквёт ват нупыл хот няврам маньши латһыл потраныл хассаныл ос ват нупыл сат няврам ханты латһыл стихотворенияныл, потраныл ловиньтасаныл. Хальүс район Кульпас павылныл хурум няврам, Саранпавылныл — сат, Шайтанканыл акв пыгрищакве, Кондинский район Шугур павылныл — хот няврам. Ханты-Мансийск үсныл онтолов няврам потраныл тетсаныл.

Ты няврамаквет кинаныл пуссын жури-хотпатын сусвёсыт ос тан халанылт нох-патум аҕирищит-пыгрищит наманыл лаввёсыт. Ань ты няврамаквет наманыл хансыянүв.

**Овыл местал** майвёсыг Кугин Иван, тав Кульпас павылт олы, щашёкватэ Евдокия Ивановна Кугина школа няврамыт маньши латһыл потыртаҕке ханищтыанэ;

— ос акв аҕирищкве Коротаева Анна, тав Ханты-Мансийск үст

«Лылын союм» колн маньши латын ханищтаҕке яланты. Тан ётаныл Ольга Мартыновна Норова рүпиты.

**Титыт местал** майвёсыг: Загайнова Марина, тав Саранпавылт олы, тот Светлана Савельевна Мерова тананыл маньши латһыл потыртаҕке ханищтыанэ;

— ос Ханты-Мансийск үсныл Норова Алина, тав ос «Лылын союмн» маньши латын ханищтаҕке яланты.

**Хүрмит местал** майвёсыг: Кутмаров Афанасий, тав Шугурт олы, тот Валентина Ильинична Вахрушеван тан маньши латһыл ханищтавет;

— ос акв пыгрищакве Вьюткин Руслан, тав Ханты-Мансийск үст ханищтахты, «Лылын союм» колн саҕквилтаҕке ос маньши латын ханищтаҕке яланты, тав ётэ Раиса Мартыновна Гаврильчик рүпиты.

Мот няврамыт ос савсыр номинацият

янытлавёсыт: Тихонова Лена щар яныт стихотворение ловиньтас, пумыщ щирыл ловиньтасыт — Шоколдаев Александр (Шугур), Гусякова Тоня, Дементьева Виктория, Осипова Анастасия (Ханты-Мансийск үс).

Нёмсаг потыртатм няврамыт ты — Лихачев Андрей (Шайтанканыл), Конева Софья (Ханты-Мансийск үс) ос Ларионова Карина (Саранпавыл).

Суиҕ турсуил ловиньтасыт — Колова Светлана (Ханты-Мансийск үс), Герасимова Анастасия ос Савчук Злата Саранпавылныл.

Хотыот ос номинацият ат янытлавёсыт, тан дипломыл ос ловиньтан нэпакытыл мүйлуптавёсыт.

Рётыҕ юсвой ётпос ват нупыл овыл щисла щань латын янытлан хоталыг олы. Та хотал Ханты-Мансийск үст округ библиотекат тув ёхталам няврамыт янытлавёсыт, мүйлупсатыл, ловиньтан нэпакыл мүйлуптавёсыт. Няврамыт пуссын аквхурип нэпакыл майвёсыт, ты Светлана Павловна Кононова (Молданова) хуньт ханты ос руц латһыл хансыглам потранэ ань нэпакыг ваввёсыт. Тамле нэпак няврамытын ловиньтаҕке пумыщ паты.

Няврамыт ёт рүпитан ос маньши латһыл ханищтан хотпатын ман пумащипа латын лавёв. Ятил нэквет, нан сака эрнэ рүпата варагын, латһув хот ул вос сойми, эри манти халувт потыртаҕке. Мотыт щёс ос тамле конкурс вараыглэв.

**Галина КОНДИНА**

## Танки

**Х**альүс район Саранпавылт олмум сус школа щань латһыл каснэ окружной олимпиада олыс. Ты тал ты касыл няврамыт маҕыс танки ханищтахтын коланылт вараыглас. Аҕирищит-пыгрищит нёмхотталы ат тотыглавёсыт, ос округ палыл комиссият олнэ хотпатын касыланыл ищхипыҕ ут хосыт сусвёс. Ты элы-палт Хальүс район школыт аквтох савсыр олимпиадат няврамыт кассыт.

Рётыҕ юсвой ётпос сатхуйплов щислат щань латһыл хаснэ касыл олыс. Мантонт, «Югра» намба телерадиокомпаният, «Ханты ясанг» ос «Лүимэ сэрипос» газетат рүпитан хотпат, Саранпавылт олсүв. Касыл суснэ маҕыс ман школан вовхатсүв. Алпыл суссүв, тот акв классыт ищхипыҕ утаныл пуссын ёмщакв щёпитымат. Ётылнув тув ат няврам щалтсыт, аби похат тан лаввёсыт, тананылн маныр ётвиҕке рөви.

Анжелика Владимировна Петренко, Саранпавыл школа ваҕын кұщай нэ, хумус олимпиада нэпак-лөпсыт макыг хансуҕке эрөгыт, таи потыртас. Тан пуссын вартаныл ищхипыҕ утытн тара пославет ос тувыл школа кұщайт ты утаныл округ комиссиян суснэ маҕыс кётиянылта. Няврамыт хансум рүпатаныл тара ос пославет, аквтох округ комиссия-хотпатн ловиньтаҕке кётавет. Тан тот сав маныл кётым



## ХАНИЩТАП

# ӨЛНЭ ПАВЛАНЫЛТ КАССЫТ



А. Семёнов



Л. Чупрова



Г. Артеева



Е. Гындыбина

нэпакыт сунсыяныл ос шар ёмасыг хансым рүпата пёриёгыт.

Ты тал Саранпавыл школат маныщи латың ванэ нила аги ос акв пыг касылт кассыт. Тыи 11 классыт ханищтахтын агииг Лена Гындыбина ос Галя Артеева, 10 классыт ханищтахтын агииг Настя Лещук ос Лена Чупрова. Тувыл 8 классыт ханищтахтын пыг Альберт Семёнов. Ты тал тав арталахтын магыс касуңкве вөввес, мотынтыг мот няврамыт халт касуңкве паты. Няврамыт пуссын Светлана Савельевна Мерован маныщи латңыл ханищтавет, тав школа кұшаитн рүпататэ магыс ань эсгувес.

Анжелика Петренко ты тэлат овылтыт лавыс:

«Ты тал овыл щёс мән школанувт тыщырыл касылыт вәрыглавет. Манрыг тох вәрвес, ам ат вәглум. Ул Ханты-Мансийскан миннэ лөх ос тот өлнэ магыс сав олн холтаве. Мән, нила агит ос акв ханищтан нэ, тув ялнэныл магыс китсат сөтыра солкөви ловиньтәлсүв кос. Мот школат ул ос сав олн хұлтсыт.

Тамле савсыр олимпиадат школавт вәруңкве манапн мощ тарвитыг олы, тыт ЕГЭ өлнэ порат ос сав рүпитэв. Ань тыт манапн акваг уральтаңкве, тармыл сунсуңкве эрэгыт ос таи лөль, амки ханищтан нявраманум хұлтуптыяну, элалы ханищтаңкве ат вөрмияну. Мот хөтпа

вәрнэ рүпатаныл мән та вәриянүв. Тувыл мот школат няврамыт хумус касэгыт, мән ос ат вәглүв. Ты элы-палт районный олимпиадат нөх-патум няврамыт акв үсн атыглавэсыт ос тот акв щырыл хансэгыт, тот аквкөмыл уральтавет.

Тыт няврамыт хаснэ рүпатаныл астанэныл юи-палт мән щёс-охса сыс вос пөслыянүв ос округ комиссиян вос кэтыянүв. Тувыл касың школат хумус олимпиада олыс, лов хөтал сыс ты кина хурип хури почта хосыт кетуңкве лаввесүв. Тән тот сунсыяныл ос ётыл ювле латың кетэгыт. Тот нэматыр торастан ут ул вос олыс.

Ам ань таи номсэгум, хансум рүпатаныл тара сунсавет ос нөх-патум хөтпат тән пөриёгыт, наманыл тах та лавияныл. Тувыл кина суснэ юи-палт матыр лөль ке хөнтэгыт, тән маныр вәруңкве патэгыт? Ам ань мот предметыт щырыл хансым олимпиадат урыл лавегум. Ты тал Хальүс районт кит агииг ат манос хөт савсыр

олимпиадат нөх-патсыг. Мән вәглүв, касылын щёпитахуңкве сака тарвитың. Тән магыг нөх-патсыг ке, туп суснэ кинат ос янытэт сунсуңкве эрэгыт, матыр хоса хал ул вос ошсыт. Ань мән нявраманув ёмашакв вос хансэгыт».

Рэтың юсвой этпос 21 щислатэ щань латың янытлан мирхал хөталыг олы. Төнт щань латың ванэ няврамыт халт олум олимпиадат нөх-патум няврамыт наманыл хұлтвэсыт. Ань округ янытыл щань латың касылт 22 ханты ос маныщи няврамыт тәнки халанылт кассыт. Хансым рүпатат Белоярский, Хальүс, Хөнтаң, Октябрьский, Сургутский районытыл ос Ханты-Мансийск үсныл кетвэсыт. Маныщи няврамыт халт нөх-патсыт: овыл места – **Елена Гындыбина**, китыт места – **Галина Артеева**, хұрмит места – **Анастасия Лещук**. Агит пуссын Саранпавыл школат ханищтахтэгыт. Тән олныл мивет тах, мот няврамыт сертификат-нэпакыл мүйлуптавет.

**Тамара МЕРОВА**





# Саранпавылт нъяврамыт магыс



**Р**ётың юсвой этпос нёлоловхуйплов щислат Саранпавылт яныг ялпың хотал вāрыглавес. Та хотал искусства школа 25 тālэ тōвлыс ос таве янытлан магыс клуб-колт сāv махум акван-атхатыгласыт. Хальўсныл, Ханты-Мансийсканыл ос мōт мāныл мўй хотпат ёхталасыт. Тāн школан ялнэ āгирищит-пыгрищит пуссын ханыщувлам наكانыл сунсуңкве тахсыт.

Мўй махум клубн щалтнэныл порат ъвлэт нъяврамытын кāтыл пōслым хурит, сакныл хартым хорамыт, пластилиныл пōщгим элум-холас хурит суссыт. Ты утыт вāруңкве ъс та школат нъяврамыт ханищтавет. Ос тувыл пўмыщ концерт ълыс. Нъяврамаквет такем нётнэ турсуил эргысыт, фортепьянал ёнгысыт, сāңквылтапыл сāңк-вылтасыт ос ййквсыт. Ань сāvсыр тэлат урыл янас потрыт хассум ос хурит щёпитасум.

## Хумус ты школа вāрвес

Саранпавылт музыкальный школа 1991 тāлт сўкыр этпос ъвыл хоталэт пўсвес. Тот āгит-пыгыт сыресыр утыл ёнгункве ос эргуңкве Дмитрий Георгиевич Агеевын ханищтавёсыт. Кўщаиг ъс тав тот рўпитас. Ту-выл тав сосаң махум пёс тāныт ос ййк-выт нōх-вормалтан мāгыс тот сāңквылтапыл, нарсьюхыл ханищтап вāруңкве номылматас. Такви мāньщи ос хан-ты пёс накытыл сака пўмшалахтас. Тувыл тав яныгпāла мāньщи хотпат вōвсанэ ос тāн аквѣт нъяврамыт ханищтаңкве патсаныл. 1992 тāлт тāн «Сāлы лѣх» пёс йис накыт суссылтан театр вāр-сыт. Ты музыкальный школа ос театр аквѣт

рўпитанкв патмён юи-пāлт тав национальны-иг намтвес. Ты намётыл округ янытыл ань тыг мус тав ълы.

Ань ты искусства шко-лат 84 нъяврам ханищ-тахтэгыт. Тāн нёлолов хотпан ханищтавет ос мōт нёлолов хотпат тот сāvсыр рўпата вāрёгыт.

Тув ялантан āгири-щит-пыгрищит мāнь-тāгыл эргуңкве, пōс-луңкве ханищтавет ос сāvсыр ширыл ён-галтавет. Тот тамле ханищтапыт ълѣ-гыт: «Национальные инструменты», «Ба-ян», «Фортепиано», «Эстрадный вокал», «Национальное деко-ративно-прикладное искусство», «Изобра-зительное искусство», «Живопись». Школа āстланэныл юи-пāлт нъяврамыт свидетельство-нѣпакыл мивет ос тāн мōт хотты кол-леджит, институтыт элаль ханищтахтуңкве вёрмёгыт манос клу-бын, театрын рўпитаң-кве вивет. Тувыл нъяв-рамыт касың тāl сāvсыр касылыт касэгыт ос сāv щёс нōх-патыгласыт, таимāгыс сāv эсгын нѣпак ъныщёгыт.

Ань ты школа кўщаиг Валентина Дмитриев-на Перова ълы, ты Дмитрий Георгиевич āгитэ. Школа Хальўс миркол ос районт культура, кина комитет пāлыл нётаве ос ўргалаве.



# рүпитан кол 25 тәлэ төвлыс

## «Сәлы лёх» намба театр урыл

Ты театр өлнэтэ мәгыс мән ань пуссын Дмитрий Георгиевич Агеевн яныг пұмашипа латың лавуңке таңхёв. Тав савыңпәлэ сәңквилтан пёс мәнъщи тәныт, әргыт, ййквыт хаништасанэ ос кина пёслум утн хассанэ. Нйврамыт сәңквилтапыл сәңквилтаңке ос пёс махманув холът тўлыглахтуңке Григорий Николаевич Сайнаховн, Каллистрат Петрович Лончаковн хаништавёсыт. Мария Сергеевна Мерова ос Елена Николаевна Сайнахова агит ййквуңке хаништасанэн. Матумпәлаг өлнэ хөтпанув ләвнәнһыл ширыл, тонт пёс накыт нөх-вөрмалтаңке Агеев ат ке вуйхатас, мән сымн әрнэ әрганув, тәнанув хосат тағыл та сөймынувыт.

Щар өвыл спектакль тән Юван Шесталов хансум «Языческая поэма» намба мәнъщи потыр хосыт щёпитасыт. Ётыл мөт лўимә писателит хансум потраныл, стиханыл ширыл рүпитасыт. Спектакляныл Екатеринбург, Ижевск, Москва, Санкт-Петербург ос мөт ўсытыт сав мирн сусвёсыт. Россия коньпал тән Болгария, Венгрия, Финляндия, Швеция ос Чехия мөт хөн мән вөвыглавёсыт.

Тувыл таи ләвёв, Дмитрий Георгиевич палт өвыл хаништахтам агит-пыгыт савыңпәлэтыт Ханты-Мансийскат «Хөтал» намба Ас-угорский махум

театрын рүпитаңке тәра вөввёсыт. Тыи Володя Меров, Вадим Важенин, Саша Тургачёв, Таня Истомина, Лена Фризоргер, Галя Яптина, ётыл Альбина Дозмарева, Петя ос Максим Анямовыт тот рүпитасыт. Тән мащтырыг сәңквилтапыл сәңквилтаңке ос тўлыглахтуңке хәсәгыт, ёмщакв мәнъщи ййквыт ййквёгыт. «Сәлы лёх» театрын ялум агит-пыгыт тыи школат мөт нйврамыт элал хаништаңке патсыт, тыи Настя Артеева (Астапович), Наташа Оманова (Истомина), Игорь Магарамов.

Ань сосаң махум пёс йис накыт сав махумн вәвет, ос Дмитрий Георгиевичин өвылтам тәлат округ янытыл элалэ тотавет.

## Ялпың хөтал урыл

Школа 25 тәлэ янытлан магыс Хальүс район кўчай вәнын нә Ирина Викторовна Чечёткина ос районт культура, кина комитетыт кўчай нә Татьяна Леонидовна Хазиахметова ёхталасыг. Тән тот рүпитан хөтпат эсгысанэн ос грамотатыл, янытлан пищматыл мўйлуптасанэн. Акв янытлан департаментныл өлыс. Саранпәвыл миркол пәлыл Аркадий Андреевич Рокин, миркол кўчай вәнын хум, ос ёмас латың лавыс, махум мўйлупсал мўйлуптасанэ. Тувыл Ханты-Мансийсканыл округ Дума пәлыл Надежда Геннадьевна Алексеева олн-мўйлупса тотыс. Тав Дмитрий



Н.Г. Алексеева Д.Т. Агеев ос В.Д. Перова янытлыгте



Г. Лелятов ос Ф. Хозумов

Георгиевич вәрнэ рүпататэ магыс гений-хөтпаг лавыстэ. Тыи щар сөль, тав мансәвит нйврамыт школатэ номтыңыг янмалтас. Тав ань ты агитытн-пыгытын пуссын ёмас номтыл номаве, щәнә-ащанылн сав сымың ләтңыл ләваве.

Махум әргыт ос сәңквилтан тәныт хўнтлын коньпал мән кинал сусылтавёсыт. Тот вәт нупыл ат тәл сыс школат хаништахтам нйврамаквет кинан пёслым өлсыт. Тәнанһыл сунсуңке такем пұмаш өлыс, тән ань пуссын яныгмасыт, хоталь-әти ләкква миныгласыт манос тыт рүпитёгыт. Әргын-ййквнэ нйврамыт халт щар мәниг Коля Гоголев өлыс, тав хөт тәлэ. Мөл-

ты тав Ханты-Мансийск ўсн тотыглавес. Пыгрищакве такем әргы ос кәркамыг ййкви. Щар нётнэ турсуил Лариса Мацур әргыс.

Сав агит-пыгыт ётам вәйхатасум, тән пуссын әруптан латың Дмитрий Георгиевич урыл потыртасыт. Тыи ёмас сымың хөтпа, нёмсаг өлы. Пуссын хот-щәгтым тав палтэ хаништахтуңке ялантёгыт, тавён сав шунин, посың хөтал өлуңке ләвёгыт.

Мән таве ос сака әруптылүв, пус кәт, пус ләгыл тавён! Тав өвылтам тәлатэ Нина ос Валентина агиягён элалэ вос тотаве. Төрумн, Нәй-Отыранувн тән вос үргалавет.

Тамара МЕРОВА



# Лөпмус нъяврамыт коланыл

**Х**альүс район Лөпмус павылт нъяврамыт ханищтахтын кол рүпити. Хунь кол уш үнтгүвес, тув школа ос нъяврам садик акван-түлвеси. Ювле хультум этпост ам школан щалтсасум. Та хөталытыт нъяврамыт ат ханищтахтасыт, ань грипп-агм магыс карантин олыс. Күшай нэ Татьяна Валерьевна Анямова отпускан минам.

**Светлана Алексеевна Хозумова** ёт потрамасум, тав китыт класс нъяврамыт ханищты. Нан ань элал ты маңыщи нэ потре ловиньтэлын.

— Школавт онтолов нъяврам ханищтахты. Овыл классыт кит нъяврам, китыт – нила, хұрмит – хұрум нъяврам. Нилыт классыт ты пора нэмхотыют атим. Нъявраманув элалы Кульпас школат ханищтахтэгыт, тот интернат олы.

Школавт матыр эрнэ пормас пуссын оныщев. Физкультура урок кастыл касың нъяврам ёсал миве, тан ётаныл Татьяна Николаевна Таратова рүпити. Маңыщи латың урок школавт хот-пойтыгпалвес, нилах тал ат ханищтавес.

Ювле хультум таквсы яныг күшайт латың кетсыт, ман щань латың урок вос вәрев. Нъяврамыт ёт ань Татьяна Валерьевна рүпити. Тан маңыщи латың ханищтан урокын щагтым ялантэгыт. Тованыл танти латнаныл торгамтэгыт, мощ потырэтэгыт.



Нъяврамыт ёт И.В. Анямова үнлы

Тувыл ам школат мощ ёмыгтасум, сунсыглахтасум. Коридорың мат савсыр хурит пöслым олэгыт, мойтыт лавылтан үйхулыт та маныр, пуссын тув пöслымат. Ты, насати, кит маңыщи нэг – Нина Николаевна Анямова ос Валентина Ивановна Юрьева тән катыл пöслумыг. Татем нётнэ, пұмыш хурит пöслуңкве та хаснэтэн, хотпа сома мойт колн щалтыс. Нъяврамыт катыл пöслум хурияныл колнор онтсыл нөх-тагталым олэгыт, тананыл сунсыглаңкве ос сака пұмыш.

Светлана Алексеевна лавме щирыл, тан ишхипың утыт оныщегыт, интернетаныл рүпити.

Ты ханищтахтын кол мот палёт ос маң нъяврамыт садик олы. **Ирина Валерьевна Анямова** воспитателиг рүпити, тав ётэ



мощ потрамасум, садиканыл овылтыт акв-кит латың лавыс.

— Садикын нёлоловхуйплов нъяврам яланты. Ань пуссын ат тотыглавет, тованыл агмыңыт. Ты магыс школав лап-пантвес. Тыт кит воспитатель ос кит няня рүпити. Китыг алпыл рүпитэг, тувыл пентхатэв, этипала мус мот китыг рүпитэг. Ат хөтал рүпитэв, тувыл үшлахтэв.

Ханищтахтын колнак олы, тот нъяврамыт матыр хансэгыт, пöслэгыт. Катыл хурит пöслуңкве сака таңхэгыт. Хуйнэ колнак, ёнгын колнак олы. Тананыл акваг ёнгалтыянүв, савсыр ёнгилыт номылматалэв.

Хоталь-ати эрнэ матыр тох тай пуссын оныщев, колув рёгың. Туп ёнгынот мощща. Пайтым тэнутыл нъяврамыт хұрум щес тыттавет. Йильпи тэнут школан ватихал тотыглавае.

Ты колт сака ёмас, сымың махум рүпитэгыт, яныгш нэ хотпат. Тананыл ман нэ хотпат ялпың хөталыл янытлыянүв! Пуссын пустагыл вос олэгыт.

**Светлана РОМБАНДЕЕВА**





НЭ ХӨТПАТ ЯНЫТЛАН ХӨТАЛ КАСТЫЛ

# Валентина Терешкова соссаң мирн янытлавес



**М**аньполь  
этпос хөтыт  
хөталэт Валентина  
Владимировна  
Терешкова, овыл  
космонавт нэ,  
намхөталэ олыс. Ты тўя  
тав нелсат талэ товлыс.

Ты кастыл Ханты-Мансийск ўс «Единый Россия» партия колт Татьяна Гоголева, Государственный Дума маньщи депутат нэ, Мария Волдина, пенсият өлнэ яныгпала ханты эква, Галина Кондина, маньщи газета кўщай ос мот соссаң махманув открытка-нэпак тавен хассыт ос кина суснэ тотап хосыт янытлан латың лавсыт ос кетсыт. Тонт Россия янытыл тавен сав мир сымың латың хассыт.

Валентина Владимировна Герой Советского Союза нам оныщи. Тав Ярославский область Большое Масленниково мань павылт самын патыс. Ань та павыл атим. Аги Ярославль ўс школа астлас. Та школа ань тав намё-тыл пиным олы. Щанягён-

ащягён нётнэ магыс тав мань порат рўпитаңкве овылтахтас. Маньлат порат товлыңхәпыл тыламлым парашютыл сав щёс ёлалы порыгмалыс.

1962 талт космосын тыламан магыс нэ хөтпат кинсуңкве патвёсыт. Яныгсат савиткем агитныл ат аги пёриявес. Тән халанылт Валентина олыс. Тав тара армиян космонавтыг вуйвес, тот космосын тыламан вәрмалин ёмшакв ханищтавес. Ос 1963 талт лўпта этпост хөтхуйпловит хөталэт тав космосын татыламлас. Ты щар овыл нэяныг ракетал ма мувлахи яласастэ. Ман, маньщи мир, ты намыңсуиң эква ос янытлылўв!

Николай МЕРОВ

## Нётнэ маньщи нэкве



Елена Устиновна Акбаш, аги опарищ наме Пузина, Хальўст самын патыс. Атятэ Ясунтныл, оматэ ос Хорыңпавылныл олсыг. Аги школа астламе юи-палт Ленинград ўс А.И. Герцен наппа лўимә няврамыт ханищтахтын институтн элалы ханищтахтўкве ми́нас. Астламе юи-палт,

1994 талт, Ханты-Мансийск ўсн ёхтыс. Тот повышение квалификация институтн, этно-образование кафедран рўпитаңкве патхатас. Тонт та кафедра кўщаиг Анастасия Ильинична Сайнахова олыс. Елена Устиновна татапсынлакваг тот ты рўпиты.

Маньщи нэ ты талт атпан нупыл ат талэ товлыс. Тав ханищтап элалы тотнэ институтт эрнэ рўпата вәри. Тыммагыс рўпитатэт сав щёс янытлан нэпакыл майлувес.

Елена Устиновна Ханты-Мансийск ўст хум вәрыс, кит аги янмалты. Ман, редакцият рўпитан хөтпат, таве намхөталэтыл сымыңыщ янытлылўв.

Тувыл нэт ялпың хөтал кастыл ман тавен ос янытлан латың кетэв. Агияге пустагыл вос яныгмөг, эмас хөтпат вос ёмтэг. Тан ляпа рўтаныл ёт таглың пасаныл, атың тәнутыл вос мўйлөгыт. Олупсанылаквагёмасыгвос олы. Колтагланыл сөтыл вос пинаве, туп щагтым өлән!

Николай НИКИТИН



## Ханты агиришиг

Ты ханты агиришиг – Снежана Ермакова ос Катя Сопочина. Тән колтагыл махманән Когалым ўс пөхат сәлы ўрим ворт өлэгыт. Агиришиг Русскинской павыл школат ханищтахтэг, интерна-тыт өлэг. Ты тал тән китхуйплов талән товлыс, сатыт классыт ханищтахтэг. Тэнти халэнт щань латңыл потыртэг.

Светлана МАТВЕЕВА

# Эргын-ййквнэ маныщи нэ

**Тал котиль этпост маныщи нэ Зоя Прокопьевна Хозумова 60 талэ төвлыс.**

**Тав Хальүс район Лопмус павылт самын патыс, тот яныгмас. Школа астаме юи-палт Салехард үст өлнэ культпросвет училищат ханищтахтас. Яныгмам павлэт сав тал клубыт рупитас.**

Ретың юсвой этпост ам тав этэ хонтхатыгласум, потрамасум. Нан ань элаль Зоя Прокопьевна потре ловиньтэлын.

— Ам 1957 талт кёр кұр пөхат самын патсум. Атам өлтөтөт акваг лавыглас, мовиньтас — тыт ты наң кұрын. Тав наме Прокопий Иосифович Сайнахов. Омам Прасковья Никитична, аги өпарищ наме Мерова. Тән сас Мувыңтес павыл ёрныл олсыг. Атам Антёпка каңк ос Тарья эщ онышас. Омам Василий ос Дмитрий каңкаге Хослохт олсыг.

Колтаглувт мән хұрум няврам самын патсұв. Щар яныг Паял, тав Лопмуст олыс, аги-пыг онышиглас — Коля ос Валя. Пыге щёмытэ эт Белоярск үст олы, агитэ тыт Лопмуст олы. Галя увшим школа астаме юи-палт Сургут үсн минас, тув олмыгтас. Ойкатэнтлы аги-пыг янмалтасыг.

Овил классытыт ам тыт Лопмуст ханищтахтасум. Элаль ос Кульпас школат, тот интернатыт олсум. Школа астамум юи-палт Тамара Оманова юрт агим эт Салехард үсн минасамён. Тав библиотекариг ханищтахтуңкве патыс, ам ос эргын-ййквнэ тэлан.

Мән группавт маныщи хөтпа мощца олыс — ам, Таня Шесталова ос Сортыңъя павылныл Галя Анемгурова, тувыл кит ханты агииг.

Яныгщ пуссын рушит олсыт. Мощ ётылнув хонтаң маныщи агииг х а н и щ т а х т у ң к в е ёхтысыг, тән щань латңыл потыртасыг. Тән латңаныл шар мөт хурипа, туп акв-кит латың хүлэгум, та. Потыртаңкве патэв, латңанув акван ат ёхтэгыт.

Ханищтахтуңкве мән-навн сака пұмыщ олыс. Савсыр ййквыт ййквуңкве ханищтавесұв — народный, классический, бальный. Акв урок китах щёс та ййкващлэв, ханищтахтэв, төванакт ваттал патэв, воссыг хоталь вәрхатэв. Учителянувн сака та кыщ ошвесұв. Ханищтахтамум халт концерт щёпиталсұв, павлыт халт яласасұв, эргысұв, ййквсұв. Ялпың хөталыт порат ос Салехард үст выступайтасұв. Тот хұрум тал ханищтахтасум.

**Салың махум эт вайхатасум**

Хунь училище асталасум, Ямальский районнын рупитаңкве кётвёсум. Тот районный Дом культуры колт кит тал рупитасум. Туи ань катерыл мивёв, тув палыт концертыт суссылтым павлыт халт яласасұв. Сав хөтпа щёпитахтэв, та минэв. Шурышкарский район янытыл яласасұв, Мужа павылн ос мөт мән павлытн хөиглалсұв, ййквсұв, эргысұв. Миннэв мус ос хул алышлан махум палт хөёв, тананылн концерт суссылтэв.

Мощ ётылнуве ам агиткультбригада палт хасвёсум, тув патхатасум. Мән хұрум манос нила хөтпа салың махум палт ялантасұв, кинапанкат эт-тотыгласұв, махум кинал суссылтасанұв. Тувыл потрыт (лекцият) ловиньтасұв. Акв хотты бригада мус манти минэв, тот ос ёрнколыт халт салыл тотыглавёв.

Аквщёс ань тэлы салыл минэв, сака вөтас хөтал олыс, йивтал ма, хот-тыпсұв. Салы үрнэ

махум лавёгыт: «Щар нэматыр ат наңки, тыт этхүлэв, алпылуш элаль минэв». Тән пуссын мольщаңыл олэгыт, түйт тармыл хуигпасыт, ёл-оилматвёсыт. Мән ос хумус хуёв, тамле вәрмалы нэмхуньт ат вацинтасұв, тән тай ханьщувлым олэгыт. Салыт пөхатта ёмыгтэв, пөлявёв, номсахтэв, молях вос алпыланув. Хунь алпыллас, элаль та нёвумтасұв.

Мөт щёс ос салың махманув элаль вантлысыт. Тән өлнэ ма сака ёмашакв пөриёгыт. Та порат ам руш аги эт яласасум. Ёрнколаныл хот-висаныл, хұрум ёрнкол, салың сунын талттысаныл. Мён ос нётсумён. Салыаныл кёрсаныл, та мин-мыгтасұв. Минасұв, минасұв, ёл-люльсұв. Ёрнколыт түштысанұв, щ ай и с ы л т а с у в, тэпьяласұв, ёлтахуясұв. Мён номсымён, ань өлнэ ма та пөриясыт.

Алпыллас, лёңхын щёпитахтуңкве та патсыт. Насати, мөт люльнэ ма иң кинсэгыт. Ос аквтох ёрнколаныл хот-висаныл, элаль та минмыгтасұв. Хөтал палыт минасұв, сатапас, ёл-люльсұв. Ёрнколыт түштысанув. Я-ты, ань тай ма та пөриясыт, тыг та олмыгтэгыт.

Салың махум хунь ма пөриёгыт, салы алэгыт. Тара тэңкв үнтэгыт, няр нёвыль тэгыт, келпын пувтмалэгыт, келп аёгыт. Пайтым пүт морсың порат тэгыт.

Мён юртнэм эт төванакт татем исмит тэңкв тахмаимён, китыглахтымён, пүт пайтуңкве рөви, тән лавёгыт, манрыг ат рөви. Пүт пайтымён, пуссын







Вадим ос Эльвира апыгрищаге



аквьёт ўнтэв, тэпьялэв. Тән ос хунь пасан вәрэгыт, нярнэвыль, нярхұл тұлэгыт. Вина сака ат айгласыт. Акв сулья пұнсэгыт, яныг-хотпат хотьют кәсаши, аквман щәркал пинаве, таитэ аялытэ, элалэ ёманты, рұпиты. Кучум хотпа нэмхуньт ат вәсум.

### Мәнь Зоя

Ёрн махум руш аги-риш нупыл нэматыр ат лавэгыт, амётумтай ёрн латңыл та потыртэгыт. Ам лавэгум: «Нән латңын ат торгамтылум, ам мәньши нэ». Тән китыглахтэгыт: «Ман-рыг тох лававён - мәньши, ты маньрман латың? Мән латңувтыл мәнь - ты ам». Ам ос ювле лавэгум: «Мән щирувт - мәнь». Тувыл махманум лавэгыт: «Мән наңын Мәнь Зояг лавуңк патылүв». Ювле миннэм мус ам нуп-лум акваг та лавсыт — Мәнь Зоя. Тамле олупса та вәсум, та пұмышч порам ань тыхотал мус номылматалылум.

Тувыл амти мамн йисум, хум вәрсум, клубыт рұпитаңкве патсум. Тапоратолупсав сака пұмышч олыс. Мәньлат хотпат клубын акваг ёхтыгпалсыт, пуссын аквьёт концерт щёпитэв, ййквёв, эргёв. Клубув туп мёрсың порат лап-пантыгласлүв.

Ййльпи тал кастыл тув хөвт капай тұлэв, савсыр

утытыл хорамтылүв. Сыре-сыр конкурсыт, лотереят щёпитэв. Тонт ялпың хоталыт кастыл сака ёмас мүйлупсатыл тотыглавесүв. Товат костюмыт щёпитэгыт, тот та поргащлэгыт.

Яныгхотпат ос выступайтасыт, тән халанылт Анна Григорьевна Албина ос Матвей Павлович Ромбандеев шар артист хотпаг олсыг, матыр костюмыл масхатэг, та ййквёг, ошхуль вәрэг. Тән ляльтән сунсым, махум маттем та мовиньтэгыт.

Ам тот сав тал рұ-питасум. Тувыл хунь школа ўнттуңкве пат-вес, клуб колув хот-ёхтувес. Ань клубтал та олэв, ййльпи колыл аман хунь ўнттавёв, тавагт. Мәньлат махум, ныврамыт ань тыглев-тувле нас та ёмыгтэгыт.

### Яныгмам порам

Хунь Кульпаст хаништахтасум, ань холыт хунь, хоты хотал каникуланув ойгпёгыт, тара Кульпасн та тотавёв. Ащирмаң ман ати, лувыл та минэв. Тот мән ётув Хослөх ос Хорыңпавыл ныврамыт хаништахтасыт. Тән Лопмус мус ювыт, тыт эт-хулэгыт, луваныл ўшлахтэгыт, мотыт хотал элалэ та нёвумтэгыт.

Мән, Лопмус агит, каникулыт кастыл интернатыт ййквыт, эргыт щёпитэв. Юв

ёхтэв, концерт вәрёв. Павыл махманувн пұмышч, пуссын ёхтэгыт, тонт мир сав, клуб шар таглэкв.

Элнаң пуссын мис, лув ошсыт, туи пум вәрёв. Мән эт палыт ёнгасэв, алпыл уш ёл-хуёв. Пуңканув мощчан ёл-пинумтәлыанүв, оманувн пум вәруңкв та квалттавёв. Та порат моторхапсака атим, пум вәрнэ мән мәньхапыл ялантасүв, тұпыл та товантэв. Кон акваг ёнгасасүв, тэлы сыпт тахсысүв, хотал палыт тот та капыртэв.

Вәщиль хотал порат, ты руш щирыл Старый Новый год, сәснэлыт вәрёв, мольщаңыл ман матарыл масхатэв, колыт латыл яласэв, пёс махманув холыт та тұлыглахтэв. Амтайтара ханышавем, ань савсыр щирыл шакарәлэгум, ййквёгум. Колн туп щалтэв, ййквуңкв патэв, талягалэгыт: тытай Зоя.

Мот агит хоса ат ханышавет — Тамара Оманова, Домна Ромбандеева, Ира Албина. Гадайтан вәрмалы тай ос сака эруптаслүв - нянь таңрысүв, валенка пахвтысүв. Тувыл нәпак пеламтэв, колнор онтсыл тотылүв, эрттам маныр тот тэлы, таи та ёмты.

Кон найванят ос ййвсуп маляшлэв — товың те, ныврам онь-щёгын тах манос ёмас ойка тотэгын. Тасавит

мовиньт, ошхуль олыс. Та порат мәньлат махум пуссын кәркамыт олсыт, рұпитаңкве хассыт, ўшлахтүңкве хассыт.

Зоя Прокопьевна потре та ойгпас. Ой-катэ наме Василий Александрович Хозумов олыс. Тән ат пыг оньшигласыг, хұрма-нән атимыг ёмтсыт — Вова, Коля ос Саша. Китгагён хумыг-ўйг уш кос ёмталасыг. Ойкатэ хотталы щалтме лов талыг ты ёмтыс.

Кит пыгаге сас щёмьяныг. Шар яныг Олег Саранпавылт олы, экватэ наме Таня, нила ныврам оньщёг. Толя пыге Лопмуст олы, Василиса экватэнтыл нила аги-пыг янмалтэг. Пыгагён нётаве, найвыл, витыл тотаве. Пенсия олныл ёхталаве, лави, матыр-ати ёвтуңкве ат төвылхаты. Толятэ хұл алышчы, омагэ хұлыл тотыгпалытэ.

Зоя Прокопьевна мөлты тал миркол палыл ййльпи колыл майвес. Тав ань кит мәнь амприщаге ёт олы, юв тартыяге, тамле пұмшиг, тав юи-пә-лэт та хайтыгтэг. Мән, газета вәрнэ хотпат, таве намхоталэтыл янытлылүв! Сав тал пустәгыл вос олы, Най-Отыранән вос ўргалаве!

Светлана  
РОМБАНДЕЕВА

# Өлттумп павылт яныгмам нэ



**Мария Владимировна Ситникова Сургут үст сав тал олы, «Пёс Сургут» нампа музей колт мащтырыг рүпити. Тән, тот рүпитан мэхум, савсыр ялпың хөталыт вәрыглэгыт, пёс вәрмалянув, пёс наканув үст өлнэ мирн суссылтыяныл.**

Молты тал мөн тав өтэ хөнтхатыгласмён. Маныщи латңыл хоса потыртасмён. Ань та потрумён 8 март нэ хөтпат янытлан хөтал кастыл ам ушты маныщи газетавт ты хансылум.

## Яныгмам поратэ урыл

Мария Владимировна 1945 тал лүпта этпос 2 хөталэт Хальүс район Өлттумп павылт самын патыс. Оматэ – Анисья Тимофеевна Мойбутова, аще ос руш хум олыс. Анёкватэ Матрена Савельевна (аги өпариш наме щирыл – Гоголева) ос өпатэ Тимофей Петрович Тоболдино павылт өлсёг. Мария Владимировна яныг

анёкватэ Сүкыръя павылныл олыс, аги өпариш наме – Сайнахова. Хайталыма юи-палт Өлттумпын тотвес. Тав хоса нот, яныгсат акв тал, олыс.

## Аще урыл

Мария Владимировна аще Владимир Михайлович Иванов Түпыл (Тобольск) үсныл олыс. Тән хұрум руш манылат хумыт Ягримт рүпитасыт, тувыл тән маны павлытн рүпитаңкв тетыглавёсыт. Акв юртаныл Анисья маныщи аги та касалам, тән акван та олмыгтасыг. Төнт аги хөтхуйплов талэ уш төвлыс.

Щанён руш хум вәруңкв шар ат тартвес

кос. Ос аги оматэ латың хұнтлуңкв шар ат патыс. Сатхуйплов талэ төвлыс, овыл агитэ Мария самын та патыс. Оматэ, увциянэ, эщанэ нэмхотыют тав өтэ потыртаңкв ат патсыт, пуссын кантмувёсыт.

Мош өлсёг, тувыл хум полшил вәрима. Тав лапкат рүпитас. Аквмат порат ты ёхтысыт. Маныр лапкат олыс, пуссын ёмашакв ловиньтавес, лаввес – сав пормас ос тәнүт ат төвылхаты. Хотталь та тотвес.

Тав ат талн каснаколн үнттувес. Тартыма юи-палт щёмьятэ палт ювле ёхтыс. Ос тара Няшхамвөлын рүпитаңкв тётвес, экватэ тав өтэ минас, тәнүт пайтнэ хөтпаг тот рүпитаңкв патыс. Агитэн анёкватэ палт хультуптастэн. Аквёт хоса ос ат өлсёг, хум ват талэ ат төвлыс, илттыг атимыг ёмтыс. Экватэ хұрум маны нывраманэ өт тактёт хультыс.

## Анёкватэ палт яныгмас

Мария анёкватэн сака эруптавес. Тав палтэ өлме порат, аги акваг маныщи латңыл потыртаңкв ханышувлас. Анёкватэ мащтырлаңкв сака хасыс. Мария

Владимировна потыртас: «Анёквам юнсахатуңкв ўнты, ам тав нупылэ тэлам атим. Тав вораёңкв, хул алышлаңкв такви ялантас. Омагум-агыгум ляпат атимыг, нёматарыл та порат ат пүмшалахтасум. Тованакт анёквам ёт титсатвортөлымен, тот пум вәримён».

Школан миннэ пора хунь ёхтыс, агириш Анъя павыл школат хаништахтуңкв патыс. Ышлахтын пора хунь ёхты, Маша тара анёкватэ палт мины, тот олы.

## Лёккарыг хаништахтас

Школа асламе юи-палт Мария Владимировна Ханты-Мансийск үсн маны лёккарыг хаништахтуңкв минас. Медучилище юи-палт Саранпавылын рүпитаңкв тётвес. Ётыл мош Хальүст рүпитас. 1965 талт яныг агитэ самын патыс.

1969 талт Сургут үсн рүпитаңкв минас. Агитэ оматэ палт хультуптастэ. Та яныг үс пүльницат рүпитаңкв овылтахтас. Ос яныг үст олуңкв ос рүпитаңкв сака тәрвитуңкв олыс, өлнэ кол ат онышис, рүпататёт мощца



М.В. Ситникова йөнтүм нуйсахит



НЭ ХӨТПАТ ЯНЫТЛАН ХӨТАЛ КАСТЫЛ

олныл ойтвес. Тувыл газоперерабатывающий заводт рүпатал майвес. Тот хус тал рүпитас. Тох яныг үст та үнтхатас.

**Рүтанэ урыл**

Акв тал Анъян юв минас. Оматэ тонт 49 талэтовлыс, тавманыши хум вāрыс, ты хуме сака аис ос алхатас. Агитэн лāvвес, Сургут үсн тав этэ пуссын вос минэгыт. Оматэ та касашас. Аппцитэ, эще, такви агитэ ос оматэ пуссын яныг үсн та вāнтлуптасанэ.

Тованакт оманыл хоса юн атим, ёхты, лāви, я вāтан ялум, тот вит нупыл сунсым хоса үнлыс. Мария Владимировна оматэ урыл тох потыртас: «Тав яныг үст олункв тара ат ханышувлас. Рүпата хонтыс, рүпитаңкв патыс. Овлэт мән пуссын вагончикыт олсүв, ётыл колыл майвесүв, лāкква та олмыгтасүв. Омам 77 талэ мус олыс, 2004 талт атимыг ёмтыс.

Ам амти ань сāv апыг оныщегум, шар яныг апыг агим такви тит нйврам оныши. Мән пуссын хум вāруңкв молямлэв. Аппчим ос тыт олы, тав лов тал аномнымлāннув. Эщум тыт, «Пес Сургут» нампа колт, ам ётум рүпиты.

Мария Владимировна Ситникова ань намыңсуиң хотпаг олы, сāvсыр яныг нам оныши. Мāщтырлаңкв сака хāсы, мāныши супыт, нуйсахит, пуңк торыт пуссын юнтуңкв хāсы. Мāнлат агит юнхатуңкв хаништыанэ.

Ань 8 март нэ хотпат ялпың хотал кастыл «Пес Сургут» нампа музеиң мат рүпитан нэквет, агит пуссын янытлыанүв. Төрүмн-Отырн вос үргалавет, пуштагыл элаль вос олэгыт.

**Валентина ХОЗУМОВА**

# Агитэ Югория намыл намтыстэ

**Т**ы хурит  
мāнълат  
ханты нэкве  
послым олы, наме  
**Ирина Явдатовна  
Ибрагимова. Тав  
Белоярский район  
Ванзеват пāвылт  
самын патыс ос  
яныгмас. Щāне аги  
опарищ наме олыс –  
Русмиленко.**

Ирина хурмит тал Сургут үст олы, «Старый Сургут» нампа музей колт рүпиты. Тав мāнълат кос, мāщтырлаңкв ос ханты мир йиквыт йиквуңкв сака хāсы. Такви уретыл тав тох потыртас:

— Омагум-āтягум Ямал мāt Харп үст Приуральский районт олсыг, тот хот хонтхатсыг, акван-минасыг. Атям башкир хум, омам ханты нэг олыс. Ам тот самын патсум. Мощ тот олсүв, тувыл мән ювле Ванзеват пāвылн ёхтысүв. Хурмит класс āстласум, Ханты-Мансийск үс центр искусств колн хаништахтуңкв тётвёсум.

Титхуйплов тал тот хаништахтасум, онтолов класс юи-пāлт колледжин минасум, тот нила тал хаништахтасум. Астламум юи-пāлт ёмас специальностил майвёсум, йиквнэ ос эргын коллектив кұшаиг рүпитаңкв вёрмегум.

Белоярский үсн рүпитаңкв минасум. Тот такос рүпата тиссум, нэматыр ат хонтсум, юв Ванзеват пāвылн та минасум. Акв тал пāвлың нйврамыт йиквуңкв ос эргуңкв хаништаса-



нум. Ос пāвылт олункв маршумыг ёмтыс.

Атапахтасум, Санкт-Петербург үсн та вāнтлысум. Тит тал тот олсум, сāvсыр мāt рүпитасум. Ос яныг үст сака тāрвитың олункве, рүпатат мощца олныл ойтвёсум. Ос юв та минасум. Белоярский үсн ёхтысум, культура центр колн рүпитаңкв вуйвёсум, тит тал тот рүпитасум. Тувыл сāv хотпа рүпатаныл хотвуйвёсыт, мән матах хотпа рүпаттāl та хуль-туптавесүв. Онтолов этпос нас юн үнлысум, рүпата хонтуңкв шар ат вёрмысум.

Агим самын патыс, Югория намыл намтыслум. Тав щāщекватэ ёт Ванзеват пāвылт олыс. Ам омам хосат атим, атям олы. Агим мощерт нила талэ товлы, иң мāн. Ань Сургут үст

олнэ кол ат оныщегум, хаштāl мāхум палт олэгум, колнак мāгыс олн ойтэгум. Юнсхатуңкв ам мāнъ тāгыл хāсэгум. Анёквām мāщтырлан хотпаг олыс, тав яныг нам онышис – «Народный мастер России». Тав матыр вāруңкв ўнты, ам тав ляпатэт та ўнлантэгум. Нила талум хунь олыс, сакныл сāvсыр хорамыт хартуңкв патсум. Тувыл лāщлакв юнхатуңкв та овылтахтасум.

«Старый Сургут» музей-колт рүпитаңкв аномн сака мұсты. Тыт ёмас хотпат рүпитэгыт, тāнаныл янытлыанум. Мән сāvсыр пёс ялпың хоталыт вāрыглэв, үст олнэ мāхум мән палтүв мүйлуңкв акваг ёхталэгыт.

**Валентина  
ВАСИЛЬЕВА**

## КАСНЭ ВАРМАЛЬ

## Россия янытыл товтыл кассыт



**Р**ётың юсвой этпос ват нупыл хōтыт хōталэт округувт олнэ мāхманув товтыл хāйтсыт. Ханты-Мансийск ўст ѓс тамле касыл ѓлыс. Та хōтал татем мālтып ѓлыс. Мāхум округ ѓвыл губернаторув А.В. Филипенко намыл маим товтыл каснэ кант акван-атхатыгласыт. Ты кастыл мāнь нāврамыт, яныг хōтпат, āгмың-мосың мāхум, āмпың суныл яласан хōтпат, соссаң мāхум ѓс тув ѓхталасыт.

Каснэ вāрмаль элы-пāлт округ губернатор вāңын хум Всеволод Кольцов потыртас. Ань ты тāлув пустагыл ѓлнэ тāлыг лāввес. Тыимāгыс тав тот атхатыглам мāхум пуссын янытласанэ, ѓс касыл та ѓвылтахтас.

Ѓвлэт акв яныт хōт-пат лāкква-уртхатым нѓлолов команда щирыл янас кассыт. Ты командат халт пуссын аквѓет хұрумсāt арыгтем хōтпат хāйтсыт. Та юи-пāлт āгмың-мосың хōтпат тахамтасыт.

Тувыл āмпың суныл яласан хōтпат кассыт. Тāн юи-пāланылт ѓс соссаң мāхманув хāйтсыт.

Ты касылн онтолов мāньщи ѓс ханты хум хōтпа ѓхталасыт. Тāн халанылт онтолов тāl яныт акв мāнь пыг ѓлыс. Ты Марк Ромбандеев, тав ты тāl ѓвыл щѓс товтыл хāйтыс. Пыгрищакве кувшил, нāрал масхатым ѓлыс. Ты вāрмаль нāврамаквен сака мұстыс.

Соссаң мāхманув халт мāk шар яныг хōтпа Александр Константинов, ханты ѓйка, товтыл хāйтыс. Тав мōтынтыг сātлов тālэ тōвлы. Ѓйка хосат тāгыл товтыл касы. Аквматнакт ѓс акв тамле касыл ѓлум порат, тав ѓвыл места вуйлас. Ѓйка округувт Совет старейшин палт хансым ѓлы. Соссаң мāхманув вāрмалит элалы тотым рұпиты. Александр Михайлович Сургутский район

Сытомино пāвылныл ѓлы. Кāркам хум сāv мирн вāве. Ань хāйтнэ мāхманувн тав ты товтыт, кувшит матыр-ати майлыс.

Ань юи-ѓвыл касылт мāхум пуссын аквѓет лѓңхын лѓльсыт. Ты каснэ хōтпат, ўщлахтын мāхум ѓс нāврамыт пуссын аквторыг товтыл хāйталтасыт. Щар ѓвлэт ѓхтум хұрум хōтпат мұйлупсал мұйлуптавѓсыт. Тāн юи-пāланылт ѓхтум хōтпат ѓс атың шоколадкал майвѓсыт. Таимāгыс кāсың хōтпа ювле ѓхтуңкве молямлас.

Тот мир āмпың суныл тахсысыт. Нāврамыт палаткат щāй āйсыт ѓс толтыглахтасыт. Тāн мāгсыланыл сāvсыр ѓнгилытщѓпитālвѓсыт. Ты касылыл кāсың хōтпа щāгтым хультыс. Товтыл хāйтнэ кант пуссын аквѓет акв сōтыра арыгтем хōтпа атхатыглас.

**Николай МЕРОВ**



**А. М. Константинов**



**М. Ромбандеев**

### Лўимā сѓрипос

(Северная зяр)  
№5 (1143), 09.03.2017  
**Соучредители**  
Дума, Правительство  
Ханты-Мансийского  
автономного округа – Югры  
**Издатель**  
Департамент общественных  
и внешних связей Ханты-  
Мансийского автономного  
округа – Югры

### Редакция

Главный редактор –  
**Решетникова Р.Г.**  
Телефон (3467) 33-36-82

Заместитель гл.редактора –  
**Кондина Г.Р.**  
Телефон (3467) 33-22-72

Ответственный секретарь –  
**Узель В.В.**  
Телефон (3467) 33-23-09

**Адрес редакции и издателя:**  
628011, г.Ханты-Мансийск,  
ул.Комсомольская, 31  
тел./факс (3467) 33-17-52

**E-mail:** [gazeta@khanty-yasang.ru](mailto:gazeta@khanty-yasang.ru)  
Газета размещена на сайте  
[www.khanty-yasang.ru](http://www.khanty-yasang.ru)

### Отпечатано:

ООО «Новости Югры-  
Производство» г. Сургут,  
ул. Маяковского, д. 14.

**Подписано в печать:**  
по графику 09.03.2017 г.  
в 9.00.; фактически  
09.03.2017 г. в 9.00.  
Индексы **04399, 54399**  
Тираж **1750 экз.**

Заказ **122**  
Цена свободная  
Мнение авторов  
публикаций не  
обязательно отражает  
точку зрения редакции.

Газета зарегистрирована  
Управлением Федеральной  
службы по надзору в сфере  
связи, информационных  
технологий и массовых  
коммуникаций по Тюменской  
области, ХМАО-Югре и  
ЯНАО.

Свидетельство о регистрации  
ПИ №ТУ  
72-00795 от 23 января 2013г.